

hinfürs kan genennet werden / sondern zur schandlichen Bosheit  
 wirdt: So seyde gesichert / Ihr werdet dem Urtheil vnd Gericht  
 Gottes nicht entlauffen. Er wirdt seine Kirch vnd sein Volck wol  
 erretten / auch ohne euch / dann Er hat ewer ganz nicht vonnöthen.  
 Aber alsdann wehe euch / die ihr Christum in seinen Gliedern ver-  
 folget habt / vnd noch verfolget: die ihr ewerer Brüder Mörder  
 worden seide: die ihr das Gut / welches ihr ewern Brüder schanda-  
 lich gestolen (dann bey euch Evangelischen / kan diß kein Beut heisse  
 sen) in ewere Häuser gebracht: die ihr zur verstorung der Kirchen  
 Gottes geholffen: die ihr euch so viel gewlicher / vnmenschlicher  
 Thaten / vnd Schelmenstück / die an ewern Brüdern / vnd dersel-  
 ben armen Weib vnd Kindern / begangen worden / theilhaftig ge-  
 mache. O wehe euch / wann ihr euch nicht bessert: Es were euch  
 besser / ihr weret nie gebohren. O wehe euch / es were euch besser / es  
 hienge ein Mühlstein an ewerem Hals / vnd ihr leget im Meer / da  
 es am tieffesten ist. Pfuy der schandt / solt ihr freye Teutschen ge-  
 boren sein / vnd solt darzu helffen / daß Teutschland vnder das  
 Pabstisch vnd Spanisch Joch komme: solt darzu helffen / daß ihr  
 vnd ewere Kinder müßet einem Spanischen Geißhirten / vnd  
 Italiänischen Knabenschänder zu gebott stehen. Pfuy / Pfuy /  
 bessert euch / oder ihr seide die schandlichsten Menschen / die je die  
 Sonn beschienen. Ich sage nicht mehr / bessert euch / oder es ist nicht  
 möglich / der Teuffel muß euch noch miteinander / mit Leib vnd  
 Seel vber einen Hauffen holen.

Wann nun jederman wie gebätten / vnd ermahnet / wolte daß  
 seine thun: so were noch gar gute hoffnung vorhanden / das be-  
 trübte Vatterlandt / vnd die betrangte Kirch möchten wider zu  
 recht / vnd in den vorigen flor kommen. Aber ob es geschehen wer-  
 de / daß jeder sein Ampt verrichte / macht mich sehr zweiffelich / weil  
 ich eben jetzt / als ich diß schreibe / glaubwürdig berichtet werde / daß  
 ein Stolzer vermeinter Evangelischer Theologus / abermals von  
 den Antichristischen / ein præsent von Fünff Tausent Thalern  
 werth angenommen / vnd daß solche Simoney von seinem Herrn  
 nicht